


Ko e Pa'anga Faifekau LOLE-POLOKÁ



Fai 'e Mckenna Clarke
Makatu'unga 'i ha talanoa mo'oni

"Pea pehē 'e Sīsū kiate ia, Fafanga 'eku fanga sipí"
(Sione 21:17).

Na'e lue foki 'a Sēleti ki 'api mei he lotú 'i he vela 'a la'aá mo Mami mo Teti. Na'á ne fakakaukau ki he'ene lēsoni Palaimelí. Koe'uhí na'e 'ikai ke fu'u lelei 'ene fanongó, na'e pau ke tokanga 'a Sēleti ki he ngaahi fakatātā na'e faka'alí'ali ange 'e he'ene faiakó mo e ngaahi lea na'á ne hiki he palakipoé.

Na'a nau ako he 'aho ko iá na'e kole 'e Sīsū ki he kau ākongá ke nau hoko ko e kau faifekau. Na'e fifili 'a Sēleti

ki he me'a te ne lava 'o fai ke vahevahe ai e ongoongo-lelei 'o hangē ko ia na'e kole 'e Sīsū. Na'á ne 'ilo na'e te'eki ai ke ne lava 'o ngāue fakafaifekau. Na'á ne ma'u leva ha fo'i fakakaukau lelei. Mahalo te ne lava 'o faka-haofi ha pa'anga ki ai!

'I he'ene a'u ki 'apí, na'e lele fakalaka atu 'a Sēleti 'ia 'Amipā, ko 'ene ki'i kosi pusiakí, pea hū ki fale. Na'á ne ma'u ha fu'u hina pelesitiki lahi peá ne hifi fakalelei ha fo'i ava 'i 'olunga. Na'á ne tohi e "Pa'anga Faifekau" 'i he tafa'akí. Na'á ne 'alu leva ki hono lokí pea to'o mai 'ene sēnití mei he lalo mohengá. Na'á ne fa'o tahataha e fanga ki'i koiní ki loto. Ka na'e 'ikai ke mei puli e takele 'o e hiná 'i he'ene koiní. 'E founa fēfē ha'ane ma'u ha pa'anga lahi ange?



Na'e fakakaukau fuoloa 'a Sēleti. Na'á ne sio ki tu'a ki he ulo 'a e la'aá. Na'e vela 'aupito 'a Filipaini. Na'e kai lole niu fakapoloka 'a Sēleti mo hono ngaahi kau-ngāme'á 'i he ho'atā kotoa pē he tuku 'a e akó. Na'á ne fakakaukau, "Ko e me'á ia!" Mahalo te ne lava 'o ngaahi ha lole poloka pea fakatau atu ia ki he kakai kehe 'oku nau fie fakamokomokó.

Na'e lele 'a Sēleti ke kumi 'a Mami. "Te ke lava 'o ako'i mai e founa ke ngaahi e lole poloká?" Ko e faka'ilonga atu ia 'a Sēleti. Na'a nau faka'aonga'i e talanoa faka'ilonga nimá, ko ha lea 'okú ke talanoa 'aki ho ongo nimá. Na'e malimali 'a Mami mo kamo ange.

'I he 'aho hono hokó, na'e lue 'a Sēleti mo Mami ki he māketi lahí pea fakatau kotoa mai e koloa na'e fie ma'ú. 'I he'ena a'u ki 'apí, na'e to'o hake 'e Sēleti ha fu'u poulu lahi pea hu'i e huhu'a niú, hu'akaú, vanila, mo e niu na'e vau. Na'e faka'aonga'i 'e Mami mo Sēleti ha fōneli ke lingi 'aki e me'a na'e hu'i ki ha fanga ki'i mile-mila. Na'á na fa'o kotoa e milemilá ki he 'aisí. "Faka'ofa' 'ofa 'aupito!" Ne faka'ilonga ange 'a Mami.

Na'e fuoloa hono fakapoloka e lole poloká. Ka 'i he 'aho hono hokó 'i he tuku 'a e akó, na'e maau ia! Na'e kaka 'a Sēleti 'i ha sea pea to'o hifo e kula hinehiná mei

he funga 'aisí. Na'á ne fa'o ha 'ū pepa holoholo 'o faliki 'aki e kulá pea faka'otu hifo leva ai e lole poloká. Na'e 'ikai ke ne fa'a tatali ke fakatau atu ia.

Na'e lele 'a Sēleti ki tu'a ki he hala efuá. Na'e va'inga hono ngaahi kaungāme'á mo e ngaahi lofa ne nau fa'u mo tolo honau silipá ki ha nge'esi kapa ke tō ki lalo.

Na'á ne fokotu'u he ve'ehalá ha tēpile pea mo ha faka'ilonga lahi na'e pehē, "Lole Poloka, peso 'e 5." Na'e lele atu hono kaungāme'á ko Sonelí mo tuhu ki he kulá. Na'á ne 'oange kia Sēleti ha koini peso 'e nima, pea 'oange 'e Sēleti ha'ane lole poloka. Na'á na tā nima.

'Ikai fuoloa mei ai kuo omi foki mo ha ngaahi kau-ngāme'á toko lahi ange 'o Sēleti ke fakatau lole poloka. 'I ha ngaahi houa si'i mei ai, he taimi na'e ui ai 'e Mami 'a Sēleti ki he ma'ume'atokoni efiáfí, ko e lole poloka si'isi'i pē na'e toé.

Na'e to'o hake 'e Sēleti 'a e kula ne mei 'osí mo e koiní. Na'á ne fa'o ha koini 'i hono kató ki he'ene vahe-hongofulú. Na'á ne fa'o leva e toenga 'o e koiní 'i hono kato 'e tahá. Na'e 'ikai ke ne fa'a tatali ke sio ki he fonu 'ene tānaki'anga pa'anga faifekau.

Na'á ne fa'o 'ene koini pa'anga faifekau ki he fo'i hina 'i 'apí. Na'e kei toe lahi 'aupito! Ka na'e ongo'i loto māfana 'a Sēleti 'i he'ene fakakaukau ki ha'ane ngāue fakafaifekau 'i ha 'ahó. Na'á ne fakakaukau ai te ne fakatau atu e lole poloká he 'aho kotoa pē kae 'oua kuo fonu 'ene hiná. Na'e ongo'i lelei mo'oni ke ma'u ha pa'anga kae lava ke ne hoko ko ha faifekau 'o hangē ko ia na'e kole ange 'e Sīsū ke ne faí. ●

Na'e hoko e tokotaha na'á ne fai e talanoá ko ha faifekau 'i Filipaini pea 'okú ne nofo he taimi ni 'i Veisinia, USA.

